

lis Gnovis

■ UDIN. Strolc pal 2022

Joiibe ai 25 di Novembar, di di Sante Catarine, si presente il «Strolc Furlan», la storiche riviste de Societât Filologjiche Furlane, rivade a la anade numar 103. La presentazion si podarà viodile a 17 in direte



«streaming», tal sit www.filologicafriulana.it. Il Strolc pal 2022, par cure di Dani Pagnucco, al sarà presentât di Mario Turello cun leturis di Maria Dolores Miotto e di Danilo D'Olivo. L'argoment di chest an al è «Ilustradoris e ilustradôrs contemporanis in Friûl»: 288 pagjinis di contis insioradis des oparis di grafics e di ilustradôrs furlans. Tra i 74 autôrs dai tescj, a son Gianni Colledani, Antonino Danelutto, Angelo Floramo, Giannino Angeli, Benvenuto Castellarin, Novella Del Fabbro, Rem Spicemei, Celestino Vezzi. A cjatin spazi ancje i scrits dai arlêfs dai Cors pratics di lenghe furlane e dai emigrâts furlans. Cul Strolc, la Filologjiche e presente ancje il «Lunari pal 2022», stampât cul jutori di «Civibank».

■ STARANZAN. Biblioteche de Legalitât

Vie pal mès di Dicembar, ai 2 e ai 3, tal Teritori si podarà seguî doi apontaments de schirie «Formazione Bill Fvg», inmaneâts dal Progjet «LeggiAmo» (www.leggiamofvg.it) par proponi la «Biblioteche de Legalitât». Joiibe, il scritôr e operadôr sociâl Salvatore Ingui al intervignarà su «Sublimi, estremi, eroici: il potere dei piccoli gesti» (a 16.30, li dal auditorium «Snidero» di Staranzan). Vinars, a 18 li de Cjase des Clapis di Pieris, i autôrs Salvatore Ingui e Angelo Sicilia si confrontaran cui animadôrs regionâi de leture cuintri da lis mafis, resonant su «Storie per crescere liberi».

■ REMANZÂS. Economie solidarie

Ancje in Friûl si è daûr a seguî il cors su la «Costruzion di un marcjât solidari e di un circuit alternativ pal cumierç», inmaneât de Universitât di Quilmes, a Buenos Aires. La partecipazion «online» e jentre tal progjet «Rafforzamento di circuiti di scambio inclusivi e solidali a Buenos Aires» che il Cumon di Remanzâs al propon cul jutori di Universitât furlane e di «Cvcs» di Gurize e cul finanziament de leç regionâl 19/2000. Lis lezions a son tacadis ai 16 e ai 23 di Novembar e a laran indevant, cun altris doi apontaments, ai 30 di Novembar e ai 7 di Dicembar. Il Cumon di Remanzâs al met a disposizion dai corsiscj il municipi par seguî il cors.

■ SPILIMBERC. La fieste de «Buteghe»

La «Bottega del Mondo» di Spilimberc, chest an, e finis 30 agns di ativitât e d'impegn pe promozion dal «Cumierç just e solidari». Il cjadalan al à stât festezât ai 19 e ai 20 di Novembar, cun dibatiments, musiche e cercjis di prodots juscj e solidaris. Fra i protagoniscj des manifestazions, Igino Brian, fondadôr di une scuele/lavoratori in Camboze, e Federica Leonarduzzi, responsabil dal Comitât «Progetti Altromercato».

Miercus 24	S. Crisogun di A.	Domenie 28	I Domenie di Avent
Joiibe 25	S. Catarine di A.	Lunis 29	S. Saturnin v.
Vinars 26	S. Dolfine vedue	Martars 30	S. Dree a.
Sabide 27	S. Valerian di A.	Il timp	Cualchi neveade sui monts.



Il soreli
Ai 24 al iève aes 7.20
e al va a mont aes 16.27.



La lune
Ai 27 Ultin cuart.

Il proverbi
La ploie cuiete e travane la tiere.

Lis voris dal mès
Puartait in ambients cjalts ulifs, limonârs, narançârs e dutis lis plantis di cjase. Se il timp lu permet, o podês taia la jerbe dal prât.

Ardîts te sperance

In vore, cui imprescj da la «Dutrine sociâl» de Glesie

«Ardîts te sperance / Creatifs di cûr»: al è chel chi il sproc ch'al compagnarà e ch'al memorearà la diesime

prime edizion dal «Festival de Dutrine sociâl», ch'al torne a Verone, dai 25 ai 28 di Novembar.

La scree e je stabilide la di di Sante Catarine cul dialic «Audaci nella speranza / Creativi con coraggio» fra il diretôr dal cuotidian «Avvenire», Marco Tarquinio, il gardenâl president de Conference episcopâl taliane, Gualtiero Bassetti, e l'economist Giulio Tremonti, li dal «PalaExpo» di «Veronafiere», a 20.45. Dute la serade e sarà trasmetude dal cjanâl «YouTube» dal Festival e sui cjanâl digjitâi di «Telepace».

Tal indoman, a començaran lis convignis, i dibatiments, lis presentazions di libris e lis manifestazions artistichis, curadis de Fondazione «Segni Nuovi», cul jutori dai «Gruppi Dsc» e di une schirie di altris socis, come «Confcooperative», «Ucid» Istitût «Beato Toniolo», «Acai», «Coldiretti», «Fidae», «Age» e «Agesc» (www.festival.dottrinasociale.it). Famee, Lavôr, Salût, Sostenibilitât e Zoventût a son lis grandis cuistions ch'a saran dibatudis e profundidis, cu la partecipazion di esperts e di testimonis di ogni divignince e sensibilitât, par vie che «no si trate di svilupâ cun motivazions gnovis chês tantis sperancis umanis, che ognidun di nô al à, – a sclarissin i organizadôrs – ma di proponi une ricercje francje, in stât di rivâ



Il placat dal Festival de «Dutrine sociâl» dal 2021

Dai 25 ai 28 di Novembar, al torne a Verone il «Festival de Dutrine sociâl»

a chè Sperance vere ch'e no delût gran, parcè ch'e à lidris saldîs e parcè ch'e ten dūr devant des provis dal timp e des situazions che la vite e propon di man vuarde».

Daspò de pandemie, e ribat la presentazion dal Festival, procurant di marcâ la diference fra sperance e otimisim, «si scuén discocolâ i vôi sun dute la realtât, madurint e començant a vivi in mût responsabil. Nissun nol à plui di permetis di vivi in mût edonistic, pensant ch'al rivarà simpri cualchidun che nus distighe i berdeis o ch'al fasarà tal nestri puest chês voris che

noaltris no vin cûr di disbratâ». Fra i protagoniscj de rassegne veronese de Dutrine sociâl, a figurin academics come Antonella Sciarone Alibrandi, Stefano Zamagni e Mauro Magatti; pastôrs e teolics come i gardenâi Pietro Parolin e Paolo Lojudice e il vescul Nunzio Galantino; ministris come Elena Bonetti, Erika Stefani e Patrizio Bianchi; artiscj come Davide Rondoni, Mogol e Gianmarco Carroccia...

La schede eletroniche par dâsi in note, si cjatile a la direzion: <https://eventi.dottrinasociale.it>.

Mario Zili

Il cjadalan dal martîr di pre' Aldo Marchiol

Ai 30 di Novembar, al cole il cjadalan dal martîr di pre' Aldo Marchiol, il missionari saverian di Udin, sassinât tal Burundi cun Catina Gubert e cul confradi pre' Ottorino Maule. Cualchi mès indaûr, al è començât il procès di canonizazion dai trê missionaris, intune cun chel dai 40 seminariscj marturizâts doi agns daspò, a Buta, tal País de Afriche centrâl. La tombe dal missionari udinês e dai siei doi compagns e je daprûf de glesie di Buyengeru.

Messe in marilenghe

A Udin, la Messe par furlan e ven cjantade ogni sabide a 5 e mieze soresere (17.30), li de capele de «Puritât», daprûf dal domo. Sabide ai 27 di Novembar al cjantarà messe pre C. Bevilacqua. Radio Spazio e trasmet sul moment, ogni setemane, dute la liturgjie.

Peraulis in dismentie par cure di Mario Martinis

❖ SFRANCJÂT

agg. e s.m. = esperto, affrancato, colui che ha superato l'apprendistato

(participio passato dal verbo sfrancjâ "affrancare")

Al cognòs un pôc il mistîr, ma no si è ancimò ben sfrancjât. Conosce un po' il mestiere, ma non è ancora esperto.

❖ SFREOLÂ

v. = stropicciare, sfregare (dal latino fricare, da friare "sminuzzare", con il prefisso rafforzativo s-)

Çe âstu di vè, che di une ore in ca tu ti sfreolis ator di me? Che cosa vuoi, da un'ora ti sfreghi attorno a me?

❖ SFUEIME

s.f. = fosso naturale o artificiale di raccolta dell'acqua piovana o di qualche rio (da collegare al latino exfoliare, da folium "foglio", "fogliola", è utilizzato in senso traslato nell'accezione "scorrimento veloce dell'acqua")

La sfueime e je secjade, o spietin la ploie par che si jempli. Il fosso è secco, attendiamo la pioggia affinché si riempi.

❖ SGAGNÎ

v. = nitrire dei cavalli; piangere o ridere represso o di soppiatto; ridacchiare, sghignazzare (di verosimile origine onomatopeica)

No stait a sgagnî su lis disgraziis di chei altris che prin o dopo us tocje a voaltris.

Non ridacchiate sulle disgrazie altrui perché prima o poi toccherà a voi.

I cjavai a àn sgagnût prin di partî. I cavalli hanno nitrito prima di partire.

❖ SGLICIÂ

v. = pattinare, scivolare sul ghiaccio (voce onomatopeica)

Zorc, che nol saveva sglicia al è sbrissât e si è sbroiat une gjambe.

Giorgio, che non sapeva pattinare, è caduto e si è sbucciato una gamba.